

高

陽

集

高陽集文卷之十九

高陽孫承宗稚繩著

門人茅元儀止生較

尺牘上

答徐永平守

以糴料之議向獨議及于門下甚爲不快而何
得更爲別言大約任事之人那得不遭口語願
門下安之不但虜誓洶洶也率言

客李本寧太常

每從宦轍見經濟皆文章再讀大集見文章皆
經濟世人不知公者曰徒有文章卽知公者徒
曰有文章卽不肖自號爲知公然纔得公以文
章爲世重而曾不得世人以經濟重公以公經
濟大手胡不揆席而落落留都冷枵腹借口卑
夔乎甚以季公晤言爲快且得悉老先生動定
獨愛莫助之耳季公自悉鄙意

東馬總戎

今天下安危繫吾輩一身而猛檢此身于天下

安危何如昨閱車同不食不寐氣咽而不下想
將軍同之也初作車營豈敢遽求合式但各將
其悍視如兒戲可惱可恨如昨果係銃炮炸裂
便當近前相恤破傷兵丁仍貴成先爲驗試或
藥有過分如止係兵丁失疎便當近前拏究其
人凡陣前要暇要整當兩軍對敵如營中失火
衆軍亂驚當何如卽砲有炸裂俱要各守信地
不得輕動一步如輕動卽梟方成軍令紛紛擾
擾到底一場空話可奈何車營議幾月矣將軍

爲全遼大將而部下不能成一車營竊爲將軍
耻之吾輩原不着意那得責成各將昨賞尤低
豈賞其能練特賞其勤勤懇懇如饑思食如寒
思衣獎之以爲勸然總吾輩急切則諸將動耳
將軍肯減去騶從之鎮兵以成一車營九解到
各車整成者俱隨兵給發責令如法操演何人
不可車何地不可車乎古大將舊事暇時可涉
獵一念之本閣部原以腐儒冒據諸將之上愧
無能振諸將以報朝廷惟將軍可爲我釋此念

答游直指肩生

僕意以佳總督制兩淮開府率膽識諸道便
弁心齊力好爲之竄直捷竄簡易非敢裁總督
非敢去撫也世有會心人如公肝膽爲君傾矣
舊曾識孟生肯與我共鞭弭乎煩典記爲僕一
從吏之敢不下榻以俟

答永平餉司周之夫

一入維婁兩庚歲籥古人拊髀而嘆今且幾無
髀矣荒徼寧復問春華乎過承問信壁謝不旣

答岳石梁

當事須以膽目今人心洶洶正需稚圭膽以鎮之誰謂謝太傅爲矯也項子假特予之

又

關外屯種需耕牛甚急而僕逖行有司之事可嘆也除此中派買尚需千餘敢藉白指下教諸城共成之業擬端官解價令以赴召下先此仰聞不既縷縷

答李直指應昇門人

得佳總督提兩佳撫各兼防欵而邊事可幾定
侯欲合總督之任重兩撫之權非敢裁督且以
去欵也年來邊人苦楚乘暇爲言耳此地此時
以刻爲歲而囊雖不可況畫餅乎僕抵閔裁汰
不急之官五百餘人而汰兵一萬二千營將非
有羨員獨調來有未任事者以備急需而三大
將當無事爲多一有事則少其偏鵠者未易材
也獨不得門下一閱關城冀以權諸要急耳以
五方雜選之衆而餉不繼芻焚不繼卽繼而米

珠薪桂之區曾不能加秋毫于日餉之外外驅
之法繩之日與講親上死長望其固結之我誠
雖然有法在焉日提報其將而氣可振今立十
車營而已成其六遂覺有生色也獨衆議守閑
而邊人遂以關外爲不可有必欲驅十餘萬人
仍赭此二百里地其以五千頃爲屯而買耕牛
萬具耕牛子種各萬開新煤煮舊鹽盡以爲煮
賊而中右之役幸曰宜然一部署曰殺我曰遣
戍我一聞警輒發家眷而人心洶洶永平焚如

絲韓稚圭不許入以瞻失膽誠未易許也雖不
必有穎而何論囊乎僕豈辭怨而經撫去者二
矣邊事何堪屢變僕處何地敢不佩諸公藥言
以圖大計惟門下爲我一體言者之意耳僕不
計生死寧計毀譽獨在事文武一聞言而顧盼
則僕所謂心更苦也兒輩念僕學業俱荒兼以
待試父遣之銓兒欲得禮教可以筭餘及之乎
門下念我予以肝膈之言再四披瀝殊切感佩

附謝

又

凡客兵利速戰主兵利久守今以進戰之備爲
久守之需而糧料不繼責以親上死長爲仁義
之師固已難矣卽兵果仁義不遁不譁而年復
一年坐食便自坐困今天下曾有計及此者乎
故以遼人守遼土以遼土養遼人爲便計而今
又以爲生事端于關外不如閉關待賊來却之
假令關可終閉賊可卽却僕亦有心胸救圖關
外更念賊一據寧遠由覺華以百船渡大洋則

關城百無一搆而天下安危尚忍言哉兄自會
心悉大計可爲我策之僕不好刺刺饒舌以兄
愛我情見乎辭敢略言之惟亮

柬毛總兵文龍

再披報牒具見將軍功高心苦卽叨 主上鑒
知惟益宏瞻智以大建設將軍弟雲龍固天子
之命官卽有過當曲全之或放之歸此微獨將
軍家事也念之

諭孟遊擊

諭遊擊將軍向在都門識將軍以文洎將軍將
八千衆于東而羣黨紛紛卒不聞亂更議將軍
以武游直指以曠世人豪抱社稷遠慮稱將軍
不置將軍其爲我強起助我政望之矣特諭

答王霖字

講以爲撫也應增與否惟老公祖芋賦之耳卽
諭王番趨君下幸惟蚤結以省紛紜之口爲竚
答沈總兵有容

以將軍之材膽而僕竟不能得其用甚愧之廟

如有人當不令將軍去戲下有可道哉
以寄用將軍之意何如

答張永平道春

太守自佳可諭以安心保此衝疲不必紛紛也
其諸無故而去者有法在

答遵化道張樸

當殫殘之地聽紛囂之口頗不知春色撩人而
況甲首庚呼聽子迭來安得攬條風以破隴俗
也種種有懷面傾何日辱函教璧謝可旣

高隱集卷之十一
答張涵月

僕何敢裁總督爲不款也欲得佳總督如壯猷
者善爲款防耳豈其不自揣而妄任以世方維
婁之而一總督驚地短長令一鎮回頭顧盼遂
無可共手者心不獨苦哉年兄真堪了此僕所
願同黻弭而當局自有一流人不知好家居煩
令纖兒撞破也承教悒悒

答岳石梁

一出抱關再更歲籌滄海未全禹貢誰作金湯

門自是堯封尚資鑽鑿攬條風之南宅惟
洲之爭鳴可念匈奴未滅偏驚聽子方豈敢煩
惠愛之頻仍殊切韶華之遲邁有懷明德不盡
衷言敬璧弁謝

又

此等事誰好來而誰不好去以公真肝膽乃急
于謝人言乎僕欲得佳總督耳非裁也每見世
人聞警亦自忙亂而一片伎懣心腸却自偏多
奈何

答孫總兵祖壽

新添兵雖不稱大將軍和門然亦是支柱矣願
惟勉作功名無失我幽燕本色耳槩絕交際非
于將軍爲不恭也璧謝

答劉義齊招諫

以慷慨豪傑遭時擠排此同襟所爲短氣也賊
未滅安得遽廢豪傑哉只今在何處言之惘然
兄何地何時而煩問遣耶別函幸密圖之

答王總戎威

身行開刻如臨大敵此自大將軍事不必
問聽子真訛也關隘新舊官兵甲馬錢糧煩逐
一相聞刁斗聲中那見關門春色唯將軍噓此
黍谷耳

諭趙率教

丈夫精神當爲世用無何一等人全軀念重耳
將軍可爲我倡之守備自是將軍佳兒待大用
之

答沈總戎

聞祭下且整春防矣喜甚卽有微恙似不妨從
宅中指畫諸將也奈何遽去矍鑠翁何人不盼
入馬羣乎烈男子何得爾爾甚爲心忤條次明
悉便當入告惟慎眠食自重此中已圖所以聯
東下矣

答岳石梁

天下事真自真贗自贗我不能爲贗如人不能
爲真只得與我周旋耳君子落得做君子小人
枉做小人豈不然哉翁如泰山喬岳世人安得

高下之執吾所謂真聽天下自爲廣亦不過刻
一時便宜却亦有一時亦不得便宜者吾不能
爲廣何得不認真以僕之迂借籌爲助自是本
心然何嘗敢輕以朝廷官爵相許與乎此等直
付之喁喁口也率爾

又

以兩年之速却以此時來想機神之佐正人乎
迥自它人獲以启下它人以兵启下以遊微功
自哉定有隆恩以酬庸惟在難蠲諸君子

無易突薪也壯猷大略寧獨僕藉之而一流議
論姑妄聽之耳以總督與翁僕所未敢而翁何
不宜者然僕未敢者勢不敢也姑妄聽之

答林主事

此弁號崛疆却有志介聞山石道云業爲門下
認過可恕也僕豈敢縱甲冑以倣縉紳但願爲
紳同養此甲冑之氣而粗豪者定裁之以法如
此弁頑不曉禮當以法治

答陳給事兩翼門人

求升非將也丞倅和解手耳此地枝柱爲艱
重念募主遠及所任將然頗以火器稱僕初抵
關每下各營教演本弁成熟者近千人而百人
中三孔者三之一曾與寧武營特賞其將以下
有差而檄下五部以勸比兩撫院相次以贅自
名僕多居關外或惟中而營各解一日下雄武
則本弁自爲下祀日又不遑且其下加少爲多
借稔爲衆種種無一有却又借此以懲古稱知
人善任使卽本弁隨其材局都可任使但願諸

公無過爲邊人設方略而佐以軍需一聽邊人
爲之必有以仰報朝廷如近者無一人肯來而
却從淨地說法無論說不當于邊人而此中亦
自象象也中朝當力責恢復誠其輕進邊人尚
得提極諸將進可以戰退可以守如上下只有一
怕中外却說一守邊人合諸將縮項歛足在
俚院中何日是出頭世界歲坐養十數萬烏合
之衆既難久守又難更番卽奴酋永世不來而
天下自當大亂兄以爲然否

答袁節庵中丞

歲又載長髮其日短念不敏之支碌碌傷高材
之足踈踈仰快雄猷俯慙雌甲春風細柳拊大
樹以凌霄夜雪驚池對六花而視草誰能攬銳
殊忝投觚敢勞桑梓之素懷遂極情文之慰藉
謹璧謝不盡

又

一流人顧身家不顧朝廷而却堅持人短長
予以所不必有此之不能銷而欲銷鯨鯢乎楊

弁何如能如舊弁支撐北岸乎今歲似有機括
願兄努力好爲之也如祇從世語謹防南岸料
非豪傑手所甘心矣袁進等有欲弟調來者可
乎兄爲弟密言之

東馬總戎

連日各營有事乎幸無辭勞怨以報朝廷前云
徐璉管廣武營似妥以高見管捷武營未妥也
此騎兵將而人似閃鑠進不能殺人退不欲人
攻若門下可悉心計之凡教如高不可使不

必前議以胡維寧屯種可來乎

東關內道

鹽鍋成造幾口可盡數給發寧遠以業跡備無
使有三月無鹽之嘆也

答冀其道王完虛

念馳轡旣中而第且自麾遼左千里明月
共此胡天不知火秋搖人耳目也亦時念
長安膝語乎第未卽熾此短狐而九塞清寧一
隅易竟所爲倚雲中君嚴此北鑰耳誤承重任

遂遭難妻以月之三日抵寧遠綏此殫殲以固
吾圉也幾不知春光度關門矣附謝可旣

答馮木衷

一行抱關遂不問家園事接手函便如對橋梓
在家園論文時也字人之吏最足親人一念好
心賜便是四境福澤亦是吾家福澤然存心要
仁起立身要廉處事要明了澤必死于蠟獨
法不于清廉不要錢而衙門要錢仁
恕不人而衙門善人祇是自了漢此輩要才

分留心十分防閑兄以明用起自是精妥僕好
作腐儒語想亮我意真也巡方君將及瓜乎清
俸纔六月似于期爲少須滿十月乃可耳附寄
一牘可令人酌投之附謝遠致

東陳直指九疇

念東人未職得清轡爲激揚遂以綬此殫殘其
于銅墨長吏若藉俞跗然糜哺之而參苓養之
時護其冷薄也解墨之組更加于勸廉之駕哉
一行抱關遠遯風猷謬以迂腐誤任危疆台丈

不爲梓誼一引手乎章丘馮令材操自入大衙
念其人志介遠也敢希噓植想可不負狄籠乎
惟報章之錄率爾

答趙副將

虎酋之部不擾乎其數的可約畧報我兵事惟
悉心遠計是倚念我爲謝

答畢白陽總憲

讀四大議殊佩深心大臣以道事君應若斯矣
寧獨勁骨直腸以事見乎僕齒髮日殘迂腐日

甚徒有仰雄猷愧此雌甲耳拊細柳之春風對
六花于夜雪殊覺駿狼之景爲速也過承函注
可任主臣敬壁并謝

又

登威遠山望覺華島方攬結高深于懷袖忽接
手函始覺春光隨馬度關門也已而閱殫殘之
篇則二百里濯濯十五萬噉噉不知關門有
春光矣內部之八萬寧作西江乎馬骨爲丘而
不言似恐言之又覺謝過翁以爲當何如諄諄

之愛敢不佩之

答馬總戎

聞車管有次第殊欲聚觀于關門東也漸集漸
熟便有生色人情初拉之使入尚覺牽合久習
之不知當自安妥惟門下深念之此僕與門下
大關係事諸所調度俱有條理其車之應更卽
更只取有便軍前耳此時使得怕人怨到得不
怕自家怨時方是豪傑

又

以御史之兵合船與車共來屯防此大便益事
可速令之出高將自是聰明人第世間人乖僻
多以聰明誤耳甚愛之故與兄商榷此等官都
未易得也昨聞劉定邦出門有遼人隨行頗多
此俱吾輩大業債也然俱是朝廷赤子何得不
念關外兵民可十五萬矣假令有十五萬蟻蚋
悉虜之死乎捐一身以全十五萬人仁者爲之
矣願與兄共念之

論副總兵孫諫

念將軍爲諸將翹楚第要傾此一片肝膽仰報
朝廷則百事自理尹將車噐有次序乎本官氣
不宜于衆凡百需用未得稱手將軍可夾持爲
之此自將軍事也老成人那得不念之附謝我
念

諭楊家謨等

聞五車營頗有次敘此大將軍勤心亦將軍等
勸力也吾輩生在世上旣爲人進在朝中又爲
官若縮項抽頭延挨時日便不是人如何是官

此本閣部所目念願與諸將共念之附謝念我
答董秀才

久別爲念何時坐齊頭與兄細論文也附謝念
我試竣當早向塾中爲望

答郭戶部林兵部二主事

關城十萬衆賴二兄爲拊爲防卽朽腐餘生苟
延宵旦然安知有生之樂乎事非不可爲而心
力不一令晉公笑人矣附謝

諭陳九德

將軍精勇有膽識凡吾輩要識以用膽車營好
爲之以久失約束之兵拊而有之徐以束于法
使見吾之德而不覺相安于法將軍饒爲之矣
附謝念我

答劉崇字

以百弟子約腹而入者湊來餉弟那得有此段
福力受用平生只爲少兄折乾錢見受遠譴那
敢再惹業債乎不敢受不敢受淹下幾多受了
氣的剛鬚白頭嫂又吃齋可辦肥麪筋當肉乎

賓前繼輪到此幾滿一年獨不得與兄鯨桓耳
一官何物半馬維幾讀李白子夜歌未嘗不念
今昔苦樂也益津風景儘佳更喜三堂爲一州
屬不以春秋奏琵琶記乎州尊積厚德人想念
青瑣客也唯仁兄愷梯以待諸友無以教官臉
令人不親三等簿那得送許多人甚無使勢人
必親之昨聞入賀抵都門悵悵子不得晤言爲
念齊劉兩兄欲還弟以正月之三日出略寧遠
且一月矣兩兄殊苦今年當拋此官跨蹇益津

一問白頭幾事兄可預備以待

啓葉首換

總督之議門生兩疏自明總謂此中只要一總督兩撫院此邊疆之福也不必要經略況于督師門生之旨請督師原爲整頓促督成一家當便可交付當事目今身旣不得脫而却令旁人促督此身矣合一鎮將吏聽命一人而同心協力共圖大業者凡以此一人能可否上下之也今同事之大吏以旁譏爭奪而此一人且若有

不獨在一身老師恩明如觀火而恐不爲門
生一念乎如止係門生一身亦何敢告苦告難
目今關外十五萬兵民而議廷盡闔門謝絕遼
左此等議論卽老師難任也初有撫命卽上疏
持此議得老師止不上何忍不爲門生一言令
數月來堅讓其有爲而曾不一爲獨曰贊曰五
字巡撫曰殺我曰教我克軍此等景色老師明
知之而猶疑門生以不任豈真不任乎門生苦

矣欲終不言則與何等關係而可泄泄一有言
則爲後爲諱拘一世之論而自持其禍寧有既
乎違恤我躬天下事又安忍言老師通天下爲
一身必有以教門生

又啓

初三傳牌之信非的也屢遣人至廣寧獨西虜
伺截遼人之從東歸者耳近已兩次遣謀人賊
巢矣有回鄉自新城來者信頗真然防寺則不
敢不嚴閉門之守却倚關外以寧遠難民之心

以城守將士自可無患門生以人日抵寧遠
與諸將共春防矣中後前屯則關門所倚在此
卽關門砲火儘可支撐而將士之矯矯者盡可
以戰其謂將吏不盡奉行則以一柄各操左顧
右盼至關外之屯鹽脩築安插不肯着身卽練
車營則將士肯爲而文史或不着意曰只守關
以內耳此最闕天下安危安得老師一臨關塞
盡此情形也如縮足關內可以守關門生豈獨
負竊愚好爲危事以天下爲徵幸乎凡客兵利

速戰主兵利久守今關城合秦晉川朔齊梁燕
趙之衆盡客兵也五方烏合額餉而外不能加
毫末于身而責其捐墳墓棄妻子固結于我已
自爲難而况糧料不繼卽其繼也能固結于我
不連不譁而坐食便自坐困竭天下物力每歲
養十數萬坐食之人事久變生師資財墮天下
之安危寧在賊之來不來哉今以速戰之備爲
久守之謀進則不足守則必變局外計止肩時
局中敢忘久遠故兵必議上著而守關以內

遼人亦容兵也是以從遼人之便西入者安插
前屯東來者安插寧遠二百里兩衛三所邊腹
二十七堡兵民可十餘萬城必不可不脩田必
不可不屯又爲掘煤煮鹽請脩邊垣曰以遼人
守遼土以遼土養遼人近又立十大軍營以爲
攻戰之具已完其半然此等事盡非守陴轄地
之舊而大不便于死而乞生生而乞來者之意
兼亦合天下只有一怕夫初怕而開缺失退守
遼陽再怕而遼陽失退守廣寧三怕而廣寧失

退守山海曰今山海之怕更急更切曰遼陽三十萬而敗廣寧十八萬而敗以十萬烏合當三敗之後何恃不怕而縮項歛足不思爲計徒延挨時日以了眉睫曰勿惹夫安坐而不爲計關內更難于外也且開鉄以來誰爲惹者甲冑爲謊縉紳爲蒙以吐心吐膽之腐儒強作支撐而一流人左顧右盼不肯實做肝膽如鷄如兔一聞出關曰遣戍曰殺我老師試念亦有以此中計必不可爲只當守關以內相告者乎此則

不奉于下之人非將士也然守關以內亦必有
道豈得坐而不爲古今夷狄之禍莫慘于宋玉
帛子女與而又與疆場土地退而又退當其時
亦只一怕以斷送社稷由今觀割地使諸君誠
萬世罪人然當時却亦賢人蓋上自朝廷下至
更士無一不怕正無可柰何却有一救眉睫勸
和人出以紓衆懷却亦能事男子衆心倚賴假
令計行而社稷終安斯其人豈不爲于古識時
務俊傑哉惟與而至于無可與退而至于無可

退社稷丘墟而爲天下唾其病却在自護其局
以偏任一種人遂至于戕殺忠義而不顧方今
廟堂當以恢復爲大計責邊臣以酌量進止勿
信屏藩苟且之徒自護自蒙以必守關內滅兵
省餉爲主邊人乃得提掇將士以振其殺賊之
心而機會未起邊人自不敢強進如廟堂專戒
以內守則五方烏合之衆坐食坐困邊人何所
借以提掇縱令之出曰上只責內却教我外忌
外有警而內無兵矣且關外不填實各城皆難

于東無以爲外護卽西虜便在八里舖殺人放
火如門生初抵關時門生初來西虜盡繞關門
毳幕旃車雜遝崗阜一登門而腥膻之氣撲人
目報刦殺驚傳烽火門生苦令撫官初移之中
前爲四十里再移之前屯爲七十里又再移之
中後爲百里又再移之寧遠爲二百里近總兵
官以兩協提各路將分以信地仍以撫夷將統
兵駐邊堡仍隸以鄰堡卽撫卽防而脉絡分明
支節貫注更以中右之役揚兵搗剿而各部遠

通再得市貨稍真通官不假自可爲防而今議
守以關內則虜可頻入關以撫而八部三十六
家仍環聚于關門其外之二百里地十餘萬人
何所安插而忽造語曰人怨不知誰逐之出所
怨者誰由此言之卽防西虜不可不實寧前而
况東虜據寧遠天下安危寧忍言哉守不在關
外不守戰不在關外不戰款不在關外不款至
于總督之議門生只欲得一佳總督督兩佳撫
院合款防而邊事定豈其不自揣而撓不可勝

之任其可以任者只在兩樵院老師爲社稷遠
計兩樵子門生同異何如門生之議守議戰如
此兩樵素具議于老師何如老師必見之真蓋
門生不能爲局外之觀老師必不忍于門生而
况肯忍于天下必有以教門生至于糧料不繼
軍需不補衆口雖驚而曾不一念豈有內閣臨
戎終年不准一見卽往迓十日亦不許曰是欲
卸檐曰是欲復窺中書之堂昔范希文自衆知
出安撫西邊過鄭州見呂夷簡語暫出之意或

曰朕政豈可復還李伯紀巡邊奏曰臣之行無
有復還之理中亦引希文事且言使臣既行之
後無阻難無讒謗無錢糧不足之患則進而死
敵臣之願也萬一有朝廷執議不堅臣自度不
能有所爲卽須告陛下求代罷去陛下亦宜察
臣孤忠以全君臣之義門生乞入覲抵欲稍通
脈絡無使有錢糧不足之患豈其患逐其人以
逐及僕者然天下亦有以逐爲不快者乎督軍
不必推而門生所願請于皇上者望老師一

爲門生計之以全門生所爲仕年來無不合而硬加以不合予之以入又不問合不合而硬加以不任至于議以佳總督提兩撫爲款防而硬加曰裁督曰罷款門生所爲苦衆口者此類是也非敢計毀譽也人至于不計生死而寧計毀譽

答唐令公

每念彈丸小邑乃不爲高賢所鄙夷自是名世真儒非復世人宦學也兒輩仰荷涵照令邊人

不問室家然常念其蠢愚或不足辱大治耳救
邑殫殘百無一經費而各衙門每爲鄉官題門
一搬動至數十金向者周父母遂以額賦借支
積數多而竟不能補頗爲繼治者持之僕曾盡
出所受上官之間遺以濟庫胥之急今且自念
秋毫無補于梓里而動煩多費其爲父母忠苦
甚大今敢爲父母約凡上官有贈送僕者止將
原帖付兒輩卽令具賤姓名謝帖以還報上官
僕令兒輩聞具上官交際之誼偶于往復致

或不可那移借支強爲餽送以朝廷之正賦爲
上官供私交僕諸生時曾見薛侍御繼茂曾爲
貴鄉孝感今後改文安僕時讀書其地文安澤
國也一時鄉紳十餘人而八差贈送歲可千金
舊以水泊舟居畸零戶口錢充費薛公歎曰塋
人無家忍剝其膏爲鄉官大嚼乎遂免畸零稅
每一檄下輒致諸長者帖而不持一物時舍親
姜中丞曾開府貴鄉鄖陽者倡同襟齊具謝狀
亦不煩一物僕時竊心識之蓋欲學薛公而今

獨不可學姜公平願父母俯體鄙私兩相便益
僕凡百樸誠不敢爲絲毫欺詐惟鑒諒爲希

答王典史

里中信來聞貴廳清廉不受鄉坊歛錢又明斷
仰佐堂上共爲小民福澤又曾出私錢募救火
者上官當有優崇清俸幾多可遠來送禮乎僕
在家嘗供貴廳之先任者米麪以願其清廉以
受不勞送禮可也璧謝

答王霽宇總督

佛僧如野鶴性意靈通何以頓西也承命當構
詢之以開所未解仍當咨送之耳敬復

柬馬總戎

連日各營統砲及車營嘗練乎王大將軍體力
何如臂相見乎尹將所造諸器可能督之仍與
該道言可作速應付之此公家事非可以其人
僻疆而令之悞也劉永昌豈得不薦尹應聘豈
得又參此武官不低眉于文官之故耳天下事
到如此地步尚較量如此何以做事可惜吾輩

一片肝胆矣府中有家下人來寧遠可遣數人
伴來馮有穩者揀一二匹付之永平戰車一百
二十輛小車八十輛已行該道調取矣密雲車
及遵化車尚可調也前所改造極便

答山西劉開府范董

世人語賊無不變色卻步而獨勇于紛囂之談
兼以舉世皆怕而望兵以勿怕舉世皆逃而望
兵以勿逃夫推而百計不敢來來而百計不敢
任者赴調乎若伍乎以國家養士深恩士大夫

泉耶道詎何如而一推經督滿朝無一應其來
者亦復求脫真可謂無人而腐儒不解事獨攜
空肝胆自任天下之重誠念主上深恩臣子
不宜薄報寧復念貴閑之雍容丹微之馳驅乎
老父母憂心體國一意惡公年來關門受益宏
多倘肯低徊了此乎駐寧遠忽接手函便覺森
光隨馬仰快雄風俯慙雌甲何當遠注敬謝

答馬總戎

留此一片不媚世之心便是辦賊只管練兵只

管提撥各將以共憤共怒勿使其相習爲玩愒
之風此皆它人所不得制所不得撓卽有言者
姑妄聽之夫極言者之害不過殺此身而吾方
捐身以爲朝廷曾此身之不計而况吾輩實實
做事卽言者安得殺此身果如實實做事卽見
殺于言者皇天后土寧不鑒之門下深念勿再
紛紜于衆口以致躬闕大事吾與門下共擔天
下不覺言之痛切惟念

諭祭將劉永昌

以將軍之賢而漏關院之薦則將軍之品更高
僕初爲忤忤後更爲喜卽尹杆武又加疵焉世
事可念也將軍尚平此氣留爲大敵之用不必
一一與世人較也愛之重之特爲此語將軍其
體我

答王威總兵

兵之發當酌量緩急不妨陸續來其要緊地方
仍酌量以得力兵防門下老成歷練爲國忠貞
定不率且也小侯可令善調勿躁勿惡平其心

氣節其嗜慾早出以爲國定戡定大亂勿見難
而思退勿惑于自便之言而相與以爲知幾目
今士大夫不念朝廷養我輩以高爵厚祿謂何
聞推則抵死不來既來則抵死要去門下胥目
前縉紳不爲我輩羞乎令弟好官可大家做好
諭王牧用

將軍勞苦矣如何買貨不來豈不知爲春季用
將軍悉心調停有意檢查勿令下人冒濫仍
好爲諸部渠既有戎索我自當守漢法無改

之道也勿以適間小小得些須功便傲以加之
可注意

答王霽字總督

僕腐儒也何知老公祖悉心爲大計耳僕從來
議論原不執定漢法祇願稍爲操縱如此一事
既有賞功成約便可不待講而與之既費講而
撤坐門殺將官便可稍爲斷賞之說待中有端
緒而後議然終無不賞者今不以殺人斷賞而
却以殺人增賞得無誨之殺乎將殺賊已加賊

賞賊殺將仍加賊賞夷狄貪漢財物亦復何厭
僕所低徊以此耳然終是小家數計米調湯學
問適爲大方笑也又念老公祖方以蚤竣此事
爲意不得不如此處分是唯指縱諸弁蚤竣僕
非敢持異議也朱梅已急促西來矣

答張永平道

久不聞高議心甚懸懸乃至勤大旆于荒原殊
佩服識之濶遠也以門下勤勤高誼何賊不滅
哉大將軍武人不必繩以深理此中獨有此人

原缺

苦也

答尤總戎

僕與大將軍同來此地凡以彈壓兵民安綏中外無使驚訛遂圖遠略至于採木架梁當以裨將出行不必煩大施也况貴體未平寧宜勞瘁于風日之中而過傷脾胃昨朱參將來俱言門下當省心力僕意正是如此願養精神以剪鯨妖耳惟珍攝勿躁

答李總戎

此小較易爲也惟大將軍所以同圖腊長鯨者
火器要陳可惡練之然不可任吾意而于各營
之不合于心者爲輕重也處此危疆只念朝廷
勿念私意大將軍德氣自當念之

答郭主事戶部

僕不善相人而善相心年來與兄周旋輒得其
心方今真品也貞不絕俗通不失已自是有用
豪傑此中諸公惡擬借重關門獨恐未肯許耳
言念高誼可任企切昨見貴衙門以所還抵所

新辦此一時搪塞語耳兄可爲貴堂翁一語

東李兵垣精白

方今虛而可實者東江也省而成費者登鎮也
實而疑虛省而嫌費者渝關也讀大疏頗關天
下安危只在解人耳寧獨負痾腐儒信爲枚發
乎小疏乞諸種種正欲奉台教忍不爲邊人一
引手乎蹈頻之極兄又忍不爲一念梓里乎每
不敢以空函煩報言遂致疎濶張鳳老體健否
附問

東萊老師并五閣老趙兵書

宗病甚諸鎮道輯其所需以請而幕中諸君爲
辭惟老先生酌裁可否而務在必遂其請乃可
爲危邊計伏枕次言不盡百一惟老先生念天
下大計一主持可任懇切

又柬魏閣老道冲

數得手教如對面披直腸快語也第實衰病之
極諸公獨不一憐而放之必令死于荒寒不足
而中書羞乎舊好欲遲我政尚有六七公言

汪文言尚有揭救也相方何如豈以弟尚欲竄
中書之堂乎病于外而愈于內寧有竊餘

答朱工部門人國盛

以門下久勤而所至功高其節縮每至千萬乃
靳一加銜乎宦如噉蔗餘而得味更佳竊儒行
徑不合世論而冒任天下之重遂且維婁之今
天下怕賊甚于遼廣而備賊更省于遼廣多方
誤所忌之人而不思已多方誤所怕之事以金
繒予虜付二三遊弁而曰真以糧料予兵合文

武大吏而曰冒宋專恃和議謂賊不再來詔減
秋防之兵故李伯紀謂禍生于忽然所防之虜
卽所和之虜也今恃款西虜而議減東兵愚于
宋矣將殺賊增賊之賞四千賊殺將增賊之賞
二千以通官張大金質虜庭邀來喜峰增千金
仍鄉我被虜之人克爲逆賊令僕殺之忍乎身
任重而反制于藏身之固者陰持議而多方以
誤之李伯紀笑人矣

東李御史應昇門人

猶在講筵從衆伸解江道長事僕謂邊事任人
要專而議論不妨待邊更推敲豈其身當事而
罷天下議論皆絕勿進凡僕所饒舌以其妨邊
事不以其防身也僕豈唯不敢渙大羣而疑其
地卽其人其小羣毫有忤懣無益餘矣年來上
所去而僕不能留衆所用而僕不能止而諸公
却以爲僕曾去某留某而僕實未嘗去之用之
也小疏曰百計同仇番成自用一籌未展已見
輕敵兄爲我喟嘆乎其于諸將則尤王兩總兵

取其氣銳未浣東塵而經理百務惟馬世龍真
可任將僕以正月三日詰寧遠而尤于臘嘉平
之廿七先行凡僕出則總兵護行而其未卽久
駐寧遠者以城室未繕完不得卽以大將安梯
而僕之在寧遠酌料一切以呼籲道之從關而
應蓋在關皆辦關外之務而非親見關外之急
者未能爲呼客歲以大吏送家口而中外驚惶
非蚤出不定而彼已情形東西着數水陸機宜
疆屯要務一切非寧遠不可審酌豈其防護

應未條而輒爲無所事事之浪遊也王帥自是
懷茂心亦靈皆而尤帥猛率可戰兩人俱病而
尤更重此中人情不樂久處危邊武人更甚操
縱去留一不得宜則衆皆鳥獸散矣特議強有
力于此陞遷弱善病于此死亡卽勞不它調卽
病不輕脫獨脆而無能猾而有疵者時櫛梳之
而供抨彈其于兵馬初就見在格數不得遽更
諸大吏議調十萬八萬後至五萬三萬僕再四
執駁止調一萬二千蓋不調則滿目逋逃不備

眉睫之患多調則征進無期遂切坐糜之憂然
遂此之數便已省減而減之又減卽大豪傑不
能竊念三敗之後賊勢更張我兵更減而今天
下士大夫怕更甚于前兵更欲減于後以金縢
予虜真費真冒而不敢問以糧料予兵日缺日
乏而反曰虛徒思多方誤所忌之人不思已多
方誤所怕之事宋專恃和議謂金人不再來詔
減罷秋防之兵大半故靖康不守李伯紀謂調
生于忽然所防之虜卽所和之虜今特款西虜

議減東兵愚于宋矣當是時以親見親嘗之事
立言百不見信而從旁道路之口一訛卽真據
其意旣以立言之人爲悞爲迂不可信而却又
不令弗悞弗迂之人代其任天下事豈悞者迂
者可任卽其人愚不足憐而衆所公怕之天下
可輕于一擲乎皇上旣未悉僕之不肖而誤
爲任又未悉天下之眞棄不肖以陰爲格而不
得任天下旣借僕之愚以塞衆人所不欲任又
借皇上之任以遂所不便其去之意而更欲

代所同者以任其患而好官自爲竊恐賊一日
未平則兵一日不解目前急以遼人換西兵僅
可省征調更番之苦不致有刼掠逋諫之患而
規模大定須俟所成就而酌今人俱曰進取相
機曰待時夫時機未至誠不可進豈時機未至
却謂之安而省兵餉以守僕方惴惴于坐待不
能守而今人已惴惴于僕之不肯爲守而好進
臣今立十二軍營設防而外馬步可九萬六千
三歲者半便戰輜不得不親馬步不得不合將

卒不得不聯砲矢更番分合便捷而馬不足者
二萬兵不足者萬有奇約雜費可六十萬金而
辦審時相機則賊之殘暴已極遼之憤怨已深
我之精銳已奮乘諸在遼者威劫未附欲逃未
能而草木滿野可以因兵可以因糧過此則遼
化爲虜編之守驅之戰俱可以逆顏行而馬不
資于草人不資于稼則輜重之費多蓋利鈍敢
謂逆睹而時機不可頃失如曰賊必不來我但
不去而兵可省餉可減僕未能也僕身爲大臣

受皇王何等付託而敢爲巧持敢爲拙擲第
身任重而制于藏身之固者又有一流人以身
所徼倖昧天下之心目者爲能而令邊人程能
千下僕觀自古大臣身任天下之重患莫大乎
中有蓄蠹待潰之人今天下衆倚爲盟者或含
怒以待所忌將岳忠武不免于割地主人而寧
唯李伯紀流落不偶也兄愛我何以策我

又

曾爲友人有言曰今天下急不難于用小人緩

不難于補君子前聞大奏有患雖用小人之
甚快來教一一奉復惟教我吳本如爲先職方
兄同門先大理兄同僚寔悉本如川中大業而
又爲我輩正當人其心事自是正當真社稷之
福也此中原無難事只要心腸正當百事可做
大豪傑手饒爲之矣突突語無以示人作談柄
也謝

東熊壇石操江

念惟真正英雄爲人倫皈倚故留京闕天下安

危而壯猷遠略遂且安留京以安天下顧何得
別天下于留京乎渝關之政亦天下一方而其
需舟車也如左右手趨轍下爲募舟而道讀詩
華之贖殊作胸春也台臺得無意乎無紛于議
而濟于行渝關倚台臺爲命矣率爾附言惟冀
在爲荷

答馬總戎

條次周詳明晰覓見心上經綸可一一爲諸
諸明仍令諸將爲其部下講明只擺設熟讀

自曉然以戰車爲主而輜車佐之其騎步馬
器具俱隸于戰車則條貫自明門下勞心瘁
乃得有此法得二三好將官演習熟自是雄
答程中丞公祖

念惟四履當天下雄要以外聯萬寓內護神皇
仰藉壯猷遂且康乂元元惠此京國蓋重地
人唯是字人之吏銷驚疑于馴雉慎操割于烹
鮮而永鑑冰壺高懸日月其于墨組清襟數
白而式敘之也安三輔以安天下卽抱關吏

者籌爲北鑰矣。擬以腐儒自達，維婁亦不遺一介于建節過承。函私殊深，悚戰率爾附謝，不旣。

答翟凌玄中丞年丈

亟擬借箸籌于渝塞了此五日，而屏息聽中朝之議，未敢發聲。頃令壯猷遠略，作美西方，猶是淪關也，獨不得共鞭弭乎東荒。耳年兄真品真心，其于固宇寧人猶擬也。天下事只要一真，西于東若橐籥然，安一隅以安天下，惟年兄惟維中餘籌也。第之腐如昨，誤入維婁祇作蠅黏年。

凡何以教第附謝不既

又

此中兵獨所調萬二千爲雄而萬人中獨履下
之甲爲雄蓋將吏矯矯乎見少也得指縱于後
旆時旄旗變色矣可任同舟之感新調諸韎韐
君子原議再歲爲瓜期今已積口餘爲安家矣
獨是天下熙熙何當此萬餘人往來而得一東
人減一西人以土換客跋跋乎其欲其卽敘也
計客兵之數不能煩爲進計客兵之情不能久

爲守而一流人聊不動念將岳忠武不免何止
李伯紀流落不偶也天下事堪此否也

答原任遵化道高中白年丈

今天下以平東之政爲楷不借外兵不費資糧
而歸然京觀其于建威銷萌猶掇也當減兵之
朝而議三十萬吾兄安得以六奇之一脫壘圍
而建節乎薊封漁鼓之閒乎得手教煩悉北猷
敢不一一佩之大英雄推枰歛手而以學子作
老草方日遭維婁乎偏父何得拔旂當雄風于

此便其留不欲其去世爲此待弟矣微人
英雄誰脫此者念之

答唐令公

恭念輝實騰茂蔚爲重地星鳳卽荒微勞人借
興誦以解束篠之思也河水爲邑一大利害微
明德迄無安流蓋築而不濬旋築旋圯而况築
不如法乎一勞永賴明德遠矣虧餘錢虜兩相
講張其一流親戚或與其奄曾相遊者或不無
援護之意在臺下自有公法誰得干之然法如

其罪而于中少從寬假微獨省紛求抑大慈也
至于逃亡沒產似宜稍遲時日倘捕獲而理之
予以應得之罪如捕必不可獲然後酌而行之
亦須量其罪合如此而後行僕聞人家父母于
子弟嚴誅之寬釋之俱是一家之天地僕固子
弟之列恐不爲有罪子弟乞寬政于父母乎一
二孝廉百惟寬之此等事微承教決不得與聞
卽聞決不敢與議生平與若曹不甚往還世駐
官頗相認其後生亦不知其名總以父母

言及之而言然非爲若曹也惟亮在

答葉首揆

裁巡撫勿裁總督其說似而非也談總督而去
巡撫其總者何督者何將以門生爲巡撫總薊
撫以督之乎門生原疏意在合總督之任重兩
撫之權蓋薊有薊撫便可爲薊遼有遼撫便可
爲遼以一督總其中而權實輕惟兩撫重則事
可做惟總督之權輕則兩撫乃重若宣雲然此
祖宗成法薊遼舊例今人不言重兩撫只言重

總督不知兩撫重則總督爲受成立斷之人而
款防得力全在兩撫卽鎮道一心齊力惟撫是
聽而大事可定其曰停推則以方今不便其留
不欲其去之計行遂念向之可來而來涉于誤
身今以可去而不欲其去更以誤天下誠若總
督一流人居靜地而特匆劇之短長意令則強
予之意不合則必去之試不避瑣括而略言其
易見者如論三鎮獨王世欽品在不激不隨論
三道獨萬有孚功在不見不聞論兩撫獨張鳳

其首謀可憂可懼論諸將則陳九德劉永昌可
以不薦尹應聘可叅查國寧可提問趙率教可
殺獨孫諫可予善地倪寵可起用以萬化孚之
千瘡百孔亟宜登壇論買馬則黃明臣爲經略
題委而鎮道刪駁至十餘兩一匹突曰十八兩
獨萬邦孚可買馬且兼招兵而迄今有未完之
爲論增兵則通津之兵可裁石匣之兵可緩關
門之兵冗而可減可汰獨王威之兵可急論各
道則張樸劉復初之不調于化孚遂不盟齒牙

而獨張鳳翼三四人可開府劉詔以永平令三年移之危關而指其過藥濟衆以永平守年半移之昌平而大其功門生豈謂所與盡不肖然而實有不肖亦豈謂所不與盡賢然而實有賢總之薊鎮以萬化乎爲主盟而岳和聲受其口舌遼鎮以萬有孚爲主盟而張鳳翼在其提索得孫諫李秉誠爲之羽翼以錦衣萬孚邦在長安中時爲含沙時爲拭穢以廣寧馱來之金邇并强有力爲座主兼以御史爲之入手故兩鎮

之人以占風驗草謂強項者受禍低眉者得名
卽王總督之博大李侍郎之謹飭不爲人藉而
群小實藉之近者總督聞憂侍郎去萬有孚黎
而群小之勢稍減是以鳳翼四顧務繼不覺無
所依而借御史以求自裁今且以憂去矣本官
旣得遂其庸怯不任之念國家亦得去一選悞
觀望之臣至于羣小中姦貪遁逃姑不深言令
其解組以全大臣之體蓋抱忠義之心者明知
天下有巧宦不忍言而工于避難者反謂天下

不復有忠義之人而可以語言簸弄以行其不
便于留不欲其去之計老師執玄鏡以照人羣
豈其于此不真知灼見而令迂腐老生俵俵閭
室乎老師于此時似當明爲分斷如門生之謏
薄不足圖大便宜明告皇上卽皇上真不
欲去門生老師亦當直指其當去如以門生材
雖中下頗負肝腸便當明教以衆人之意勿令
迂腐俵俵以誤天下老師固社稷臣其身爲社
稷必不得自私其身以求退爲急而委天下

于不計荷老師慈念曰門下困苦如此豈無分
憂共痛之念度無能爲助故只得委而去之夫
門生可委而去也門生所任何事是天下之安
危也可委而去乎以門生之病骨闔門兩月不
可去乎幸無敗壞儘可抽身然四顧茫茫誰爲
負荷士人與人祖父結交尚其以孤幼相託也
則後死者必不念之當孤劍之紛紜委而去之
卽天下未有肝膽不必交謫而謂此心何方今
總督闔撫都當急推但要重兩撫之權合總督

之任以門生爲客官則天下自定如明知其人
不以撫兼餉不以餉兼遼不以戰爲守只守關
門不肯出一步是棄天下者非獨棄遼東也惟
老師萬萬注神築塙之議自是天下大計獨此
時班兵急在關門而車營之費更急未敢出口
耳乞發帑金數萬惟老師主持并諸公力持之
爲天下大計至可爲督撫者門生原未有欲用
之人老師幸予以可其事者無令庸而且狡如
賈臣之妻千方百計只是它適窮措大竭力供

不無一遂意却令闔室不得安生苦矣

又啓

議者以總督當推而不言重兩撫則仍以總督
專欵而別于兩撫之任此其失立法之意爲邊
患甚大門生備嘗之而後敢言乞耄師立爲主
持以副撫重餉以遼撫重遼以總督合欵防督
兩撫于上而主斷受成無掣兩撫之肘更使兩
撫力得率鎮道爲欵爲防至于門生定在當罷
免卽真是皇上不欲罷免懼不過客居稍佐

末議便不必下行有司之事其得力全在兩撫盡力爲之今當揀擇有胆識者四人以新此局使旌旗變色亦快事也不然紛紛一會竟落舊巢天下事必不堪此搏弄念老師爲社稷遠計定有主持門生此身不敢問也門生胸中原無欲用之人適霽宇石梁同日謂遵化道張樸可代蒞總在廟堂定議門生決不敢與聞

答永平徐太守廷松

以門下封操而橫有議論乎頗平心應之無忤

臣也中外爲我不甘也乃見

答尤總戎

尤智何頗如此病何不且于此溫養而勞移之
答袁開府節庵

得諸將北發再討兵力稍給便成聯絡大局而
世人肖事者少從前延挨日月令當事者受其
極重不返之勢奈何惟翁力圖所以爲社稷遠
計袁進輩肯効于北岸何必在軒較下卽來此
亦借爲覺華之役也以沈舟云欲來耳功不必

問其虛餉不必問其實廟堂以此鵠突了事真可浩歎登餉豈可去司馬曹胸中無九邊而瞪目應談若斯矣

答張總戎士顯

大將須挺然獨立耻爲婢啗方是鬚眉丈夫若鞠躬縮項輸納豪門爭爲延譽及一聞警報便如蝟如蝸藏身刺殺此何足爲用平時怕內賊臨敵怕外賊只一怕便了一生昨語諸將曰能以怕死之心怕生便是豪傑將軍雅負膽識當

爲我辨所以腊長鰥者適小敵耳草草

答王總戎威

予之以事而不予以事料蓋實其責虛其應類
若斯矣姑就見在家當整頓之聊可爲備也

答王總戎世欽

少年易病而少年之病亦易痊大將軍其憫調
之當此地而抽身門下何以爲身以此時而僕
在事有少年告歸之大將僕何以爲心惟平氣
安心節飲食寡嗜慾勿急勿躁移居外室令相

知講古名將安身立命方法其正氣日克邪氣
自退惟門下念之勿再言告歸令天下掩口我
兩人也

答畢白陽

鳥倦飛而知還吾輩人也獨無倦乎還乎審時
酌勢中有所不忍耳以壯猷真品夢統鄉邦誰
復有念關魏關者津門爲遼海命脉那得不心
悸百凡倚台衡爲重石無作驚人語也銜尾如
期當不心泰焉爲快

答鍾餉道士晉

年來極悉苦心故聊爲將士忍死未敢相尤也
斷尾如期得腰可鼓且日望之矣糙春爲勞

答山石道袁

吾輩做天下事只論人不論天然天道安可誣
也此一流人非天去之又攬多時吾輩安得不
晉承天意亟爲勉圖

答關內道劉

凡百心勞爲念然心不勞事不集正須忘此勞

耳諸弁中有亟需便亟發之彭婁輩既無大失姑從寬可也西洋藥可令亟製之爲念

答趙兵書明字

方今安危在邊徼而大政在中樞承教曰撫防兼施戢守迭用願與公共圖之總督自當推但稍理鄙意總薊總遼總欽總防以遵祖宗成法無徒以大司馬職歲幣則兩撫之責成不得不重而總督之任合廣求教曰薊門總督似更遺邊防乎幸亟推之僕意原本敢裁也特世人

守節意耳。春防且盡業理旋策矣。如可守寧城
可守也。如不可守。闕城更不可守也。敢不佩良
規。馬世龍自是大將。願無聽一流人細語。而曰
可殺邊人之幸也。率爾

答王總督

讀大疏。便覺曉。豈有執板道理。向夷狄說者。
操其機構。而稍就吾理足矣。仰藉明猷。苦心敢
不爲邊人謝。

東山西開府劉沅董按院徐卿伯

念一隅未靖九野爲騷年來百九軍需其取諸
賜履猶疑也唯是同仇大誼不以饕落爲私耳
敢不爲邊人以謝敕年家張司隸抱忠烈公之
孤憤而寄志銘于兵也爲邊人開治于鄉諸所
關切竝惟呵護敢不爲邊人再謝

答昌平部鎮道

疆事參差獨藉諸公北門之鑰爲續命縷耳敢
煩典記以惠函私微璧并謝不盡

東嶽養初撫院

聞除目中外欣然相告也尉以此篇載重東偏
諸文武大吏合十萬軍聲望新旌爲色矣腐儒
異在牀下日卜台星之至止也羽使馳函請惟
蚤發爲荷

京高澍寰觀察

念惟壯猷大略載戰南服拔旆東來遂且綏此
杼軸以建威銷萌蔚爲重地殫人涵和煦育而
予之生全也獨不得頗藉德威爲遠澤腊此長
鯨耳弟一行抱關便遭維婁予之可爲而格之

以不可爲腐儒何足念獨恐諸公之志銛于兵
耳年冗何以教弟

答李太常京山

以何時北上乎祥麟威鳳于郊于庭中外耳目
蔚爾光華卽邊人亦歌一舜且也擬爲諸奏草
乞椽筆未敢遽

柬左俞憲

近事何以紛紛如此邊人遠在荒徼不能悉數
下一字惟老公祖一一教之然此何傷于正人

是諸公之意所爲似有大主張者爲之僕病
中茫昧幸惟密示決不敢妄語人也一病潦倒
遂不可支特願借大司馬以輕熟代之得正首
丘蓋此中不必怕辛司馬來亦可以盡悉此中
兵馬之可用不致鴿信人口也惟老公祖亮在
爲宗念之

諭帖

內閣諭遊擊將軍鄭繼勳近接具稟知將軍與
張盤協守金州以爲後勁往復接濟遠人便可

魚其壯者爲兵然須精而熟道路者大兵一動
便可前進爲導仍以招降我遺人以大其聲勢
但爾等遠在島嶼本閣部日向督餉爲爾等催
促程米不知可曾陸續到否將軍忠勇可與盤
悉心以報

答戶部郎曹履吉

讀河直指車疏直誦其爲膽智豪傑寔從中
輸石忘丈之深心也益佩豪傑膽智及今得聞
小書有何稱而穩茲而辨堅而不冗乎精心太

力哉豪手也僕合一營爲衛者四各有營衛得
六所名曰小衛抑何雅相符也車家防冲突爲
守僕欲且戰且前故以衛名雄哉不以人爲衛
而以銳爲衛也不以十百步爲衛而以相去里
許爲衛也中翰且去渝水而獨牽此小衛來豈
非天乎腐儒無一日敢忘黃龍玄菟其敢忘丈
之明祖謹移文以乞繕部卽高車懸銳不可得
便乞其人幸凡一一爲贊發腐儒肝胆殊不愧
丈而鈴略無一有然一片肝膽固願天下豪傑

同之也謹謝

答茅贊書

世人有相爲藉者乎但足了公事不必盡同也
解爲重且急兄可急圖之耳諸種種在兄處此
中不爲制也想自如法惟蚤爲慰趙都司西北
人而用之東南可時照顧之無令舉目無可晤
語爲悵悵也地方不知其爲官更善但我輩當
念其爲官耳若瘁心瘁力姑不敢爲兄稱苦

答吳總督

微乎兵也時其緩急輕重而用之齊老于此自
是老手大約急時無弗急也緩時無弗緩也卽
淪關摘去兩總兵而閉關謝兩虜以三萬人作
泥丸胡不可者

孫男之湯緬次

卷之十九終